

San Pedro charo chu'o tocha saosi'ea'me

Diore cuasanare si'achejña kuko saocojñosinani Pedro chu'o saosi'ea'me

¹ Chu'u, Pedro, Repau chu'ore chu'vaa'ku chini Jesucristo saosi'kupi musanukonare Repau'te cuasanare ija'ova utija'ova tocha saomu. Chekunapi kuko saorena te'enachi'a tīpāi pa'ichejña sani pa'inare, Ponto cheja, Galacia cheja, Capadocia cheja, Asia chejana'me Bitinia cheja pa'inare tocha saomu chu'u musanukonare. ² Aperumuna musanukonare mai Ja'ku Dios “Inani paara”, chiisi'kujeku chēa paamu. Musanukonare Ūcuau Rekochoji cho'okaisi'kuamū Repau, Jesucristoji musanukona cu'are kurususē'verona jūni ro'ikakuna rekoñoã meno peorekoñoã tu'nesōsirekoñoã paaju Ūcuau neenajeju Repau chu'uñe'te asa jachama'ne cho'oju paapu chini. Repauji re'oja'che pa'iche karama'ne cho'okaiuna re'oja'che pa'ijū'u.

Maire re'oja'che isijachere cuasaju pojoche'te kuamu

³ Diore Maire Paaku Jesucristo Puka'kure pojoju pañu mai, “Peore masiku'mu mu'u”, chiiju. Maire ruu oiū mai rekoñoã mamarekoñoã care'vakaisi'kuamū Repau, Jesucristo jūnisō tācojñosi'ku vajuraisi'ejekuna. Jā'ajekuna Repau pa'icheja sani Ūcuana'me si'arumu pa'ijachere cuasaju ruu pojoju cha'ame mai. ⁴ Repau maire, “Musanukonare chu'u pa'ichejana sa ruu re'oja'chere isija'mu chu'u”, chiisi'ere phū'kama'ñere porema'ñere ñañasōma'ñere cha'ame mai. ⁵ Repau Dios peore Masiujeku maire Jesucristoni masi cuasajuna masi paaku cho'okaimu, na'a pa'isirumu Repau pa'ichejana sauna

maipi Repaꝰ ïsijachere re'oja'chere koo paaa'jꝰ chini. Cheja si'arꝰmꝰna Dios maire aperꝰmꝰ Repaꝰ kꝰa jñau-manesi'ere re'oja'che peore ïsija'mꝰ.

⁶ Jã'aja'ñejekꝰna mai icheja cheja pa'irꝰmꝰ pa'ivesache chꝰova'na cu'ache ti'jñecojñojꝰ pa'inata'ni Dios maire ïsijachere re'oja'chere cuasajꝰ rꝰa pojojꝰ pa'ime. ⁷ Pãï pachokuricata cho'ona reparꝰã mini ña, repare masiñu chini toana ꝰo ko'si ñame. Jã'ata'ni repa pachokuri si'asõjañea'me. Pãï pachokuri paaneeñeja'ñe Repaꝰ'te masi cuasanare rꝰa chiimꝰ Dios. Jã'ajekꝰna maire Repaꝰ'te cuasanare pãï pachokuri pa'iche'te masiñu chini cho'ocheja'che cho'okꝰ, maire pa'icu'ache ti'jñeto te'eñoã ãsekaima'mꝰ Repaꝰ, mai Repaꝰ'te masirepa cuasache'te masira chini. Diore masi cuasani pa'icu'ache ti'jñetojẽ'e ùcua cuasajꝰ pa'ijanaa'me mai. Maipi jã'aja'ñe pa'ito Dios aperꝰmꝰ Repaꝰ Raosi'kꝰ Jesucristo icheja cheja jo'e raiumucusena maire Repaꝰ'te masi cuasanare pojokꝰ, “Re'onaa'me ina”, chiiꝰ rꝰa re'oja'chere ïsija'mꝰ.

⁸⁻⁹ Mꝰsanꝰkona Jesucristo'te jmamakarꝰjẽ'e ñamanata'ni Repaꝰ'te rꝰa chiiꝰ cuasarepame, “Dios maire Jesuni cuasajꝰna Repaꝰ pa'ichejana sara chini chẽa paamꝰ”, chiiꝰ. Jã'aja'ñe cuasanajejꝰ mꝰsanꝰkona Repaꝰ'te ñamanata'ni cuasajꝰ rꝰa pojojꝰ pa'ime. Repa pojoche Dios cho'okaichejekꝰ rꝰarepajekꝰ kꝰavesamꝰ.

¹⁰ Dios chꝰo' aperꝰmꝰ kꝰasina Repaꝰ maire, “Toana saimanea'jꝰ chini chẽa paaja'mꝰ”, chiisi'e Ûcuajꝰ kꝰaꝰna asaasome. Jã'ata'ni repare asavesꝰjꝰ asa masiñu chini rꝰa cuasajꝰ che'chejꝰ paniasome repana. Repaꝰ maire irꝰmꝰ pa'inare oiꝰ re'oja'che cho'ojache kꝰaꝰna asa ùcuare kꝰajꝰ tocha jo'kaasome repana.

¹¹ Dios Rekocho Repaꝰ chꝰo' kꝰasinare na'a pa'isirꝰmꝰ cho'ocojñojañere ija'che kꝰaasomꝰ aperꝰmꝰ:

Pãire cu'ache cho'ocojñoja'mu Cristo, chiniasomu. Ũcuachi'a jũni vajurani cunamuna muni Repau chũ'uku pa'ijache kuaasomu. Kuauna asasi-nata'ni asavesuasome repana. Vesuju, “Dios Rekocho kuasi'e, ¿je'se pa'ija'u? ¿Jeerumu ti'jñeja'u repa?”, chiiju masiñu chini ruu cuasaju che'cheju paniasome repana.

¹² Jã'ata'ni Dios repanare Repau cho'oja'mu chiisi'e ija'che i'kaku masi kua jñauasomu: “Chu'u re'oja'che cho'okaija'mu chiisi'e musanukonare cho'okaijachema'mu; na'a cho'je pa'ijanare cho'okaijachere kuasi'ea'me jã'a”, chiiu kuaasomu Dios repanare. Irumu chukuna musanukonare Ũcuau Rekochoji cunamumu Raosirekochoji cho'okaiuna Repau aperummu kuasi'ere Repau'te cuasanare chẽa paaku toa sani uuche ñsekaiche'te kuasinaa'me. Diore ja'me pa'ina ángelejat'u'ka asavesuju asamasiñu chiime repa.

Pãipi cu'ache cho'oma'ñe re'oja'che paapu chini chẽa paamu Dios

¹³ Jã'ajekuna musanukona cho'ojachere rũhiñe cuasaju care'vaju pa'ijũ'u, Dios chiiche'te cho'oñu chini. Cu'are juvoju re'oja'che pa'iju, Jesucristo jo'e raisirumu musanukonare re'oja'che cho'okaijachere ruu cuasaju pojoju cha'aju pa'ijũ'u. ¹⁴ Dios chiijeju repau chũ'ũñe jachama'ñe cho'uju pa'ijũ'u. Repau'te cuasamarumu pa'ivesuju musanukonare uachechi'a cu'ache cho'uju pa'isi'e jo'e cho'oma'ñe pa'ijũ'u chura. ¹⁵ Cu'ache jmamakarujẽ'e cho'oma'ñe si'arumu re'oja'che pa'ijũ'u, musanukonare chẽa Paaku Dios re'oja'che pa'icheja'che. ¹⁶ Repau chu'o aperummu tocha jo'kasi'e ija'che kuumu:

Chu'u cu'ache cho'oma'ñejekuna musanukona
 ũcuaja'che cu'achejẽ'e cho'oma'ñe re'oja'che
 pa'ijũ'u,
 chiimu.

¹⁷ Musanukonapi Diore, “Ja'ku”, chiiju pani
 pã ũcuanuko cho'oche peore ũcuapa'ruvachi'a
 ñaku te'enare na'a rua oima'kure musanukona
 icheja cheja vajuna pa'irumu si'arumu Repau'te
 cuasaju kukuju pa'ijũ'u. ¹⁸ Aperumu mai aipã
 pa'ivesusi'ejache re'oja'che pa'ivesusinareta'ni
 maipi jã'aja'ñe pa'imanea'ju chini chẽa paamu
 Dios maire, cu'are ãsekasa chini. Rua ro'icheji ai
 pa'iche'te ro'ikaisi'ku'a'mu Repau maire cu'are ãsekasa
 chini. Musanukona masime jã'a. Si'asõñeji kuripi
 ro'imanesi'ku'a'mu Repau. ¹⁹ Jã'aja'ñepi ro'ima'ñe
 Cristo cu'achejẽ'e peoku chiepi ro'ikaisi'ku'a'mu Repau,
 ũcuauji chũ'una mai cu'are ro'ikani chẽa paara
 chini chuenisõ raosi'epi. Aperumu pa'isina mai aipã
 repana cu'are tanoñu chini Dioni isiju ovejachi'iva're
 cu'achejẽ'e peova'uni vanisõjuna rao ro'ikaisi'ejache
 Repau chiepi rao mai cu'a ro'ikaisi'ku'a'mu Repau.
²⁰ Aperumuna chuta'a cheja cho'omarumuna Repau'te
 Cristo'te chũ'u jo'kaasomu Dios, icheja chejana caje
 pã cu'ache cho'oche'te jũni ro'ikaa chini. Jã'ata'ni
 Dios chureparana cheja si'api'rarumuna casosi'ku'a'mu
 Repau'te, maini re'oja'che cho'okaa chini. ²¹ Repau
 Cristo jũni ro'ikaisi'ejekuna Repau'te Diore cuasame
 mai. Cristo'te jũnisõuna vaso cnaumuna mu
 Repau pa'ichejana Repau'te kueñe ñu'iu chũ'ũñe
 jo'kasi'ku'a'mu Repau. Jã'aja'ñejekuna mai Repau'ni
 masi cuasaju ũcuana'me ai pa'ijachere pojoju cha'aju
 pa'ime.

²² Chura musanukona Repau chu'o ũcuarepa

asa cuasanajeju musanukona rekoñoã pa'isi'e meno tunokaicojñosinaa'me Diore. Jã'ajekuna rekoñoã re'ojarekoñoãre paaju mai majapãijanare peoche i'kama'ñe oirepache oimasinajeju peore cho'ore'ochetu'ka re'oja'che cho'okaiju sãñechi'a si'arumu oiju pa'ijũ'u. ²³ Dios maire Repa chu'o si'arumu pa'iche jachama'ñe cuasanajejuna mai rekoñoãquee cu'a tunosõkani mamarekoñoã sañokaisi'kuu'mu Ūcuana'me paapu chini. Repa mama pa'iche icheja cheja pa'icheja'chema'ñejeku jmamakarujẽ'e si'asõma'ñea'me. ²⁴ Dios chu'o tocha jo'kasi'e ũcuare ija'che kuamu:

Pãi ũcuauko u'cha pa'icheja'che pa'ime.

U'chara'ñuruã jeerumu pa'ima'ñe na'mi phã'pha jũnisõmu.

Korosi'e ũcuachi'a ruu re'oja'che koro ño na'mi tuã'tuasõmu.

Pãi ũcuaja'che ũcuauko jeerumu pa'ima'ñe na'mi jũnisõme.

Repana ruu masisi'e ũcuaja'che si'asõmu repana jũnisõto.

²⁵ Dios chu'ota'ni si'asõma'ñe si'arumu pa'iche'me, chiimu repa tocha jo'kasi'e. Repa Dios chu'o re'oja'che musanukonare chu'vasi'ea'me.

2

¹ Jã'ajekuna musanukona chekunare cuhechena'me joreche, sã'sevuchi'a re'oja'cheja'che ñoñe pa'iche, chekuna neemajñaruuã tuu paauachena'me chekunare si'ache cu'ache i'kache'te peore ũhasõjũ'u.

² Vĩjachiiva'na ojeneeñeja'ñe Dios chu'o re'oja'chere asaneeju, re'oja'che pa'iche'te na'a ruu che'cheju pa'ijũ'u, ³ Dios Re'oku pa'iche asa chẽarepasinajeju.

Catapũ re'oja'ipũjekũ charo ũhasi'pũja'che pa'ikũ'mũ Cristo

⁴ Jesucristo'te jovosinajejũ Repaũni si'arũmũ na'a rũa cuasajũ pa'ijũ'ũ. Chekũna pãĩ catapi vũ'ere je'najũ catapũ rũa re'oja'ipũta'ni cuhejũ s̃ẽjoñeja'ñe cuheme Repaũ'te, Dios rũa chiiũ Chẽasi'kũre. ⁵ Mai Repaũ'te cuasana ũcuaja'che catapũã Repaũ vũ'e je'najapũãja'ñea'me. Repaũ'te cuasakuanupũ vũ'e rũa re'ojavũ'epi, chuta'a pi'nimavũ'aja'chea'me. Pãipi Repaũni si'arũmũ na'a jainũko cuasajũ jovojũna Repaũ'te cuasakuanupũ aineeñeja'ñe na'a ũjakuanupũ'me. Ũcuachi'a mai majapãĩ judĩo phairipãĩ Diopi pojoa'kũ chini jo'cha va'iva'nare ĩsijũ vanisõsi'aja'che Jesucristo re'oja'che cho'okaisi'ejekũna Ũcuauũni cuasajũ Repaũ chiiche'te cho'ojũna pojomũ Dios maire. ⁶ Jã'ajekũna Dios chu'o aperũmũ tocha jo'kasi'e ija'che kũamũ:

ĩÑajũ'ũ!

Vũ'e re'ojavũ'e cho'opi'rakũ catapũ
re'orepaja'ipũjekũna mini ra chareparo
ũhañeja'ñe

chu'ũ chẽa paaku'te Cristo'te Jerusalén vũ'ejoopona
raomũ chu'ũ.

Repaũ'te cuasanare ũcuarepa cho'okaija'mũ chu'ũ
repanani cacũ'omanera chini,

chiimũ. ⁷ Maire Repaũ'te cuasanare catapũ rũa
re'oja'ipũ rũa paaũapũja'che pa'imũ Repaũ. Jã'ata'ni
Repaũ'te cuhenare ija'che kũamũ Dios chu'o aperũmũ
tocha jo'kasi'e:

Vũ'e cho'ona cuhejũ s̃ẽjosi'pũ Diopi cho'ouna
re'oja'ipũjekũ charo ũhasi'pũja'che pa'imũ,
chiimũ. ⁸ Chekũcheja ija'che kũamũ:

Chũ'u, Dios, pãipi tota tãapũ chini ma'ana catapũ
ũhañeja'ñe Repaũ'te raoja'mũ,
chiimũ. Jã'ajekũna pãi Repaũ chũ'ore asa jachajũ tota
tãiñeja'ñe cu'ache pa'ime, aperũmũna Diore, "Chũ'u
Neekũni cuasacuhejũ cu'ache pa'ijanaa'me ina", chiico-
jñosina.

⁹ Maita'ni Repaũ chẽa paacojñonajejũ Dios pãi-
jejũ, re'ovãjũ pa'ijũ, phairipãi Diore sẽekaiçheja'che
pãi ũcuanũkore sẽekaijũ pa'inaa'me. Maire chijache-
jaja'che cu'ache pa'isinare chẽa paamũ Repaũ, maipi
miañeja'ñe re'oja'che pa'ijũ Repaũ Masiũ pa'iche'te
chekũnani kũajũ paapũ chini. ¹⁰ Aperũmũ mai Dios
neena pa'imanessinaa'me. Chura Repaũ neenaa'me mai.
Ūcuachi'a aperũmũ Repaũ oicojñomana pa'issinaa'me.
Chura Repaũ oicojñonaa'me mai.

Dios neena pa'iche pa'ijũ Repaũ'te cho'okaina
pa'iche'te kũamũ

¹¹ Asarepajũ'u, chũ'u majapãijana. Mai icheja cheja
jmamakarũ pani Dios pa'icheja ai sani pa'ijanajejũ
icheja canama'me. Jã'ajekũna mũsanũkonare cu'ache
cho'ouato jũvojũ'u, cacu'ama'ñe re'oja'che pañu
chini. ¹² Diore cuasamana ñajũ'te re'oja'che pa'ijũ'u,
repanapi irũmũ mũsanũkonare cu'ache i'kanata'ni
Dios pãi ũcuanũko cho'osi'e ro'iche rani chũ'ũmucuse
mũsanũkona re'oja'che pa'ijũna ñanajejũ Repaũni, "Rũa
re'okũ'mũ mu'ũ", chiapũ.

¹³ Dios chiiche'te cho'ojũ pãi chũ'ũna chũ'ũñe
jachama'ñe masi cho'ojũ pa'ijũ'u. Mũsanũkona
pa'icheja si'achejña pa'inare ũcuanũkore chũ'ũku
chũ'ũñe cho'ojũ pa'ijũ'u. ¹⁴ Ūcuachi'a repaũ'te ja'me
chũ'ũkaijũ te'enare chũ'ũna chũ'ũñe jachama'ñe
cho'ojũ pa'ijũ'u. Cu'ache cho'onare ro'iche chũ'ũjũ

re'oja'che pa'inare pojojꝰ pa'inaa'me repana. ¹⁵ Dios musanukonare re'oja'che pa'ijũ'ꝰ chiimꝰ, pãipi Dios pa'iche vesunapi musanukonani ñajꝰ cu'ache cutumanea'jꝰ chini.

¹⁶ Pãi chekunare chẽa paacojñomana pa'iche pa'ijꝰ musanukonare cho'oꝰache'te re'oja'chere cho'oꝰ pa'ijũ'ꝰ. Jã'ata'ni, "Chẽa paacojñomanajejuna ũcuaꝰache cho'ore'omꝰ chukuna'te", chiima'ñe cu'ache cho'oꝰache'te jꝰvojꝰ re'oja'chechi'a cho'oꝰ Dios chẽa paacojñona pa'iche pa'ijũ'ꝰ. ¹⁷ Pãi ũcuanukore ña kukujꝰ re'oja'che pa'ijũ'ꝰ. Chekunare Jesure cuasanare oijꝰ pa'ijũ'ꝰ. Diore cuasajꝰ, kukujꝰ pa'ijũ'ꝰ. Musanukona pa'icheja si'achejña canare chũ'uku'te re'oja'che cutujũ'ꝰ.

Cristo cho'ocojñosi'eja'che cu'ache cho'ocojñojꝰ re'oja'che pa'iche'te kuamꝰ

¹⁸ Asarepajũ'ꝰ, chekunare chẽa paacojñona. Musanukonare paanare ña kukujꝰ repana chũ'uñe jachama'ñe masi cho'oꝰ pa'ijũ'ꝰ. Re'oja'che paanarechi'a masi cho'okaima'ñe cu'ache paanarejẽ'e masi cho'okaijꝰ pa'ijũ'ꝰ. ¹⁹ Pãiu Diore cuasakujꝰ cu'ache cho'oma'kupi cu'ache cho'ocojñosi'kuta'ni pe'rukꝰ ke'rema'ñe pani ruꝰ re'oja'che cho'omꝰ. ²⁰ Musanukonapi cu'ache cho'osi'e ro'ire pe'ruma'ñe cu'ache cho'ocojñoni, ¿ũ'quea'che musanukona re'oja'che cho'oche? Jã'ata'ni cu'ache cho'omanapi cu'ache cho'ocojñosinata'ni musanukonapi ke'remaneni ruꝰ re'oja'che cho'ome, Diopi ñato. ²¹ Jã'aja'ñe cho'oꝰ paapꝰ chini chẽa paamꝰ Dios musanukonare. Cristo cu'ache cho'omanesi'kuta'ni cu'ache cho'ocojñokꝰ ke'remanesi'kuamꝰ. Maini cho'okaiꝰ jã'aja'ñe cho'osi'kuamꝰ Repaꝰ. Musanukona Repaꝰ cho'osi'ere

cuasaju ũcuaja'che cho'oju pa'ijũ'u, musanukonare cu'ache cho'oto.

²² Repau Cristo jmamakarujẽ'e cu'ache cho'omanesi'kuamũ.

Ũcuachi'a te'eũ'terejẽ'e joremanesi'kuamũ Repau.

²³ Pãi Repau'te cu'ache i'kato sãĩne cu'ache i'kamanesi'kuamũ Repau. Repau'te asi cho'onare, "Sãĩne cu'ache cho'oja'mũ chu'u musanukonare", chiimanesi'kuamũ Repau. Diopi pãi ũcuanuko cho'oche ro'iche ũcuarepa Chũ'ukujji repana cu'ache cho'osi'e ro'i cu'ache ti'jñe chũ'ua'ku chini juvosi'kuamũ Repau Cristo. ²⁴ Ũcuauji mai cu'a kurususẽ'verona jẽ'jocojño jũni ro'ikaisi'kuamũ, maipi cu'ache cho'oche'te ũhasõ re'oja'chere cho'oju paapu chini. Repau Cristo mai rekoñoã vajua'ju chini chuenisõ ro'ikaisi'kuamũ maire. ²⁵ Aperumu mai ovejava'na ma'are vesuju cavesõsinaja'ñe pa'isinaa'me. Jã'ata'ni chura Cristoni oveja kuirakuja'che pa'ikuni jo'e co'icheja'che cuasaju jovorena kuiraku cu'ache ũsekaimũ Repau maire.

3

Rũjona'me ũju re'oja'che pa'iche'te kuamu

¹⁻² Rũjoromi, muũju pãi chũ'ũne jachama'ñe masi cho'oju pa'ijũ'u, repanapi Dios chu'o cuasamana pani musanukonapi repanani ña kukuju cu'ache cho'oma'ñe re'oja'che pa'ijuna ña chu'vachiima'ñe Jesuni cuasaa'ju chini. ³⁻⁴ Ija'chea'me re'oja'che pa'iche: Sẽ'sevuchi'a re'oja'che ñomajñarũã raña vãto pa'iche, pachokuri cho'osimajñarũã ju'ichena'me kãña re'ojakãña ju'iche ruarepa cuasaju pa'ima'ñe rekoñoã re'oja'che pa'iche'te na'a ruã cuasaju pa'ijũ'u. Rekoñoã re'oja'che pa'iche, pe'kerũ pa'ichena'me re'oja'che i'kaju pa'iche ca'nivũ airekocheja'che airekoma'ñea'me. Ũcuachi'a Diopi ñato

rɯa re'oja'imɯ jā'aja'ñe pa'iche. ⁵ Aperɯmɯ pa'isina romi Dioni cuasaju jā'aja'ñe pa'ijɯ repa na rekoñoãpi re'ona paniasome; ãjɯpãi chũ'uñe jachama'ñe masi cho'oju paniasome repa. ⁶ Jā'aja'ñe paniasomo Sara. Repa ãjɯ Abraham chũ'uñe asa jachama'ñe cho'oko repa'te, “Chũ'ure paaku'mɯ ikɯ”, chiio paniasomo. Mɯsanɯkonapi vajuchuma'ñe re'oja'chere ũcuaja'che cho'oju pani repa chiijana pa'ijanaa'me.

⁷ Mɯsanɯkona ãjɯpãi ũcuaja'che mɯrũjoromi cuasaju re'oja'che paajũ'u. Na'a koka peonajejuna masi kuiraju paajũ'u repanare, Dios ñiche re'oja'che pa'iche ja'me koonajejuna. Jā'aja'ñe pa'ijɯ Dioni sēeto mɯsanɯkona sēeñe asaja'mɯ Repa.

Re'oja'chere cho'oju cu'ache cho'ocojñoñe'me

⁸ Mɯsanɯkona ũcuanɯko sãñechi'a cuasaju majapãija'ñe pa'ijɯ cavama'ñe re'oja'che ja'me pa'ijũ'u. “Jā'anare na'a rɯa masimɯ chũ'u”, chiima'ñe sãñechi'a oijɯ re'oja'che cho'okaijɯ pojojɯ pa'ijũ'u. ⁹ Pã mɯsanɯkonare cu'ache cho'onare sãñe cu'ache cho'omanejũ'u. Mɯsanɯkonare cu'ache i'kanare sãñe cu'ache i'kama'ñe Dioni re'oja'chere sēekaijũ'u repanare. Jā'aja'ñe re'oja'che cho'oju paapu chini chēa paamɯ Dios mɯsanɯkonare. Jā'aja'ñe cho'oto re'oja'che cho'okaija'mɯ Repa mɯsanɯkonare. ¹⁰ Repa chũ'o aperɯmɯ tocha jo'kasi'e ija'che kuamɯ jā'a:

Pã re'oja'che pa'iɯ pojokɯ pasa chiikɯ cu'ache i'kachena'me jorechũ'o cutuche juvoa'kɯ.

¹¹ Cu'ache cho'ochete ũhasō re'oja'chere cho'okɯ paau. Re'oja'che pa'iche'te ku'e jña re'oja'che paau.

¹² Dios re'oja'che pa'inare pã kuirakɯ repa Repa'te sēeñe asakɯ pa'imɯ.

Cu'ache cho'onareta'ni repa chiiche ãsemɯ Repa,

chiimɯ.

¹³ Mɯsanɯkonapi si'arɯmɯ re'oja'chere cho'ojɯ pa'ito pāi te'eɯjẽ'e cacɯ'omanejanaa'me mɯsanɯkonare. ¹⁴ Jā'ata'ni mɯsanɯkonapi re'oja'che cho'ojɯ cu'ache cho'ocojñoni pojojɯ pa'ijũ'ɯ, Dios re'oja'che cho'okaijachere cuasajɯ. Pāi te'eɯ'terejẽ'e vajuchuma'ñe pa'ijɯ kukumanejũ'ɯ. ¹⁵ Pāijẽ'e vajuchuma'ñe Cristoni cuasajɯ vajuchujɯ, “Chɯ're paaku'mɯ Repaɯ”, chiijɯ cuasajũ'ɯ. Si'arɯmɯ masi cuasajɯ pa'ijũ'ɯ, pāipi mɯsanɯkonani mai pojojɯ cha'ache'te s̄eto kɯamasĩnu chini. ¹⁶ Jā'ata'ni repanare ña, vajuchujɯ pe'kerɯ kɯajũ'ɯ, “Rɯa masiɯ'mɯ chɯ'ɯ”, chiima'ñe cuasajɯ. Cu'ache cho'oma'ñe re'oja'che pa'ijũ'ɯ, Jesure cuasanajejɯ mɯsanɯkona re'oja'che pa'iche'te pāipi cu'ache cutuni kukusōa'jɯ chini.

¹⁷ Chekurɯmɯ Dios maire te'eñoã cu'ache cho'ocojñoa'jɯ chiimɯ. Jā'ata'ni maipi cu'ache cho'osi'e ro'ire cu'ache cho'ocojñoto cu'amɯ. Maipi cu'ache cho'oma'ñe re'oja'chere cho'ojɯ cu'ache cho'ocojñoto na'a re'omɯ. ¹⁸ Maire Paaku Cristo mai ũcuanɯko cu'ache cho'ochete ro'ikaiɯ chuenisōsi'kɯa'mɯ. ũcuate'echoji peore ũcuanɯkore ro'ikaisi'kɯa'mɯ. Re'okɯjekɯ cu'ache pa'inani cho'okaisi'kɯa'mɯ Repaɯ, maipi Diona'me re'oja'che paapɯ chini. Maija'ia pa'ia chuenisōsi'kɯta'ni Dios Rekochoji cho'okaiɯna jo'e vajuraisi'kɯa'mɯ. ¹⁹⁻²⁰ Repaɯ Cristo jūnisō rekochoji apereparɯmɯ Noé pa'irɯmɯ ko'sauna jūnisōsina pa'icheja pa'inare chɯ'vajianasomɯ. Aperɯmɯ repana chuta'a vajurɯmɯ Noé choovɯ ɯjavɯ cho'o pi'niñetɯ'ka repanare pe'ruma'ñe cha'akuni Diore jachajɯ paniasome. Repavɯ cho'o pi'nisirɯmɯ okopi ra cheja si'acacheja ko'sa timuuna pāi ũcuanɯko runisōsirɯmɯ ochorepanachi'a jū'iñe ũsecojñoasome.

²¹ Okochi'a pa'icheja repana jũ'ima'ñe pani etajani re'oja'che pa'isi'eja'che mai irumũ cu'ache pa'iche'te jo'kasõ Jesuni cuasajũ jovo okoro'vecojño re'oja'che pa'ime chura. Okoro'veche rupũ ca'nivũ pa'iche meno choachema'mũ. Pãi re'oja'che pa'ijũ repana Dios chiiche cho'oneeñe okoro'vecojñoñeji cho'o ñome. Jesucristo chuenisõ tãcojño vajũraisi'ejekũna jã'aja'ñe cho'ona Dios pa'ichejare ai sani pa'ijanaa'me. ²² Jesucristo Repaũ vajũraisirumũ cunatumũna muni Dios uajajũtu cakã'kona kueñe puũ ñu'iu chũ'ũku ãsekũ pa'imũ. Aijekũ ángeles chũ'unare chũ'ũmũ. Ũcuachi'a pãi ũcuanũkore chũ'unana'me vati chũ'unare ãsekũna repanare uache cu'ache cho'ojũ Repaũ ãsemamajñarũachi'a cho'ome.

4

Dios ñicheji masijũ chekunare cho'okaiche'te kũamũ

¹ Jã'ajekũna Repaũ Cristo cheja pa'irumũ cu'ache cho'ocojñosi'eja'che cho'ocojñojũ cuasajũ pa'ijũ'ũ. Maipi pãire cu'ache cho'ocojñojũ Repaũni ũcua cuasani cu'a juvoche che'chesõme. ² Cu'are juvomasini maire ũcuauache cho'ouache cu'a cho'oma'ñe pa'ijũ mai jũnisõñejatũ'ka Dios chiiche'te cho'ojũ pa'ijanaa'me. ³ Aperumũ musanũkona Diore cuasamana cho'oche ruã jeerumũ cho'ojũ pa'isinaa'me. Ũcuauache cho'ojũ romineejũ, umũneejũ, cono ũkunachi'a pa'ijũ, vẽ've pa'ijũ ruã si'ache cho'ojũ, tũosiva'nare pojojũ pa'isinaa'me. ⁴ Chura musanũkonapi aperumũ ũcuauache cho'ojũ pa'isi'ere cu'are ũhasõ repanani ja'me cho'oma'ñe pa'ijũna ña jña'nejũ si'arumũ ruã cu'ache cutujũ pa'ime musanũkonare. ⁵ Jã'ata'ni repana cu'ache pa'isi'e Diore ti'jñeñe nukajũ kũache pa'ija'mũ

repanare, pāi jū'isina cho'osi'ena'me vajuna cho'oche ro'iche chū'uku'te ti'jñeñe nukaju. ⁶ Jā'aja'ñejekuna Jesucristo'te cuasache kuachu'o, jū'isinajatuka chu'vacojñosi'ea'me, repana vajuna pa'irumu ũcuanuko cu'ache cho'osi'e ro'i cu'ache ti'jñecojoño jūnisōsinata'ni, rekoñoāpi ũcua vajuju Dios pa'icheja'che ai paapu chini.

⁷ Icheja cheja si'asōrumu t'api'ramu. Jā'ajekuna rūhiñe cuasaju cu'ache cho'ouache juvoju re'oja'che pa'iju Diore sēemasina pa'ijū'u. ⁸ Ie ũcuachi'a asarepajū'u: Sāiñechi'a oirepache oiju pa'ijū'u. Musanukonapi sāiñechi'a oirepani chekurumu ruarepañoā cu'ache cho'onijē'e ũcua re'oja'che ja'me pa'ijanaa'me. ⁹ Sāiñechi'a pojoju te'eu'terejē'e cuhema'ñe musanukona vu'ña t'anare káiñe īsiju pa'ijū'u. ¹⁰ Musanukonapi cho'oa'ju chini Dios ũcuanukore si'acairo īsisi'e Repau Rekochoji cho'okaiuna cho'omasiche cho'okaiñamema'ñe chekunare re'oja'che masi cho'okaiju pa'ijū'u. ¹¹ Chekunare chu'vani Dios chu'ore chu'vaa'ju. Chekunare re'oja'che cho'okaina Diopi cho'okaiuna koka paaju ruu re'oja'che cho'okaiju paapu, Jesucristo'te cuasanapi si'arumu Repauni, “Ruu re'oku'mu mu'u”, chiiju paapu chini. ũcuachi'a Repau'te cuhama'ñe si'arumu pojoju, “Peore Paakuji peore Masiu'mu mu'u”, chiiju pañu mai. Jā'aja'ñe paau.

Jesuni cuasaju cu'ache cho'ocojñoñe'te kuumu

¹² Asarepajū'u, chu'u cuasava'na. Pāipi musanukonani cu'ache cho'oto ña jñanomanejū'u. Jā'aja'ñe pa'imu maire Jesure cuasanare, maipi mai rekoñoā Repau'te cuasache'te cho'o ñoa'ju chini. ¹³ Cristo cho'ocojñosi'aja'che cu'ache cho'ocojñoñi Repau pa'isi'aja'che pa'inajeju pojoju pa'ijū'u. ũcuachi'a Repau jo'e rani pāi ũcuanukore chū'urumu mai

ũcuaja'che pojojũ ja'me pa'ijachere cuasajũ pojojũ'ũ. ¹⁴ Cristoni cuasajũna pãipi mũsanũkonani cu'ache i'kato pojojũ'ũ, Dios Rekocho Masirekochoji mũsanũkonani jo'kasõma'ñe ja'me pa'ũna. ¹⁵ Mũsanũkonapi ũcuauakũji cu'ache cho'ocojñoni pãi vanisõsi'kũpi, põse ñaasi'kũpi, jã'apãani cheke cu'ache ũcuauache cho'okũ, chekũna cho'ochete ñakũ ja'me cutukũ ke'resi'kũpi cu'ache cho'ocojñokũ pa'imanejũ'ũ. ¹⁶ Jã'ata'ni mũsanũkonapi Jesure cuasanajejũ cu'ache cho'ocojñoni kũkũma'ñe Repau neenajejũ Dioni, "Re'orepamũ, Ja'kũ", chiijũ pa'ijũ'ũ.

¹⁷ Pãi ũcuauko cho'osi'e ro'iche Dios chũ'urũmu tĩ'apiracuhamũ. Charo Repau neena cho'osi'ere cuasa ñaja'mũ Repau. Jã'a cho'o pi'ni Repau chu'o jachasina cho'osi'e cuasa ña repana cu'ache cho'osi'e ro'i rũa vajũchũache peore ro'iche chũ'ũja'mũ Repau. ¹⁸ Dios chu'o tocha jo'kasi'e ija'che kũamũ repa: Re'oja'che pa'inarejẽ'e Dios pa'icheja saiche vesato, jje'se pa'ija'ũ Repau ni cuasacuhejũ cu'ache cho'onare? chiimũ. ¹⁹ Jã'ajekũna mũsanũkonapi Repauji chiiũna cu'ache cho'ocojñonijẽ'e cuhasõma'ñe ũcua re'oja'che cho'ojũ pa'ijũ'ũ, "Maire Cho'osi'kũ Dios ũcuarepa cho'okũji cho'okaija'mũ maire", chini cuasajũ.

5

Jesure cuasanare chu'vache'me

¹ Chura mũsanũkonare kuiranani, ainani, chu'vara chiimũ chu'ũ, repana pa'icheja'che aijekũ pãi kuirakũjekũ. Jesucristo cu'ache cho'ocojñõne peore ñasi'kũa'mũ chu'ũ. Repau pãi ũcuaukore chũ'urũmu chu'ũ ũcuachi'a ja'me chũ'ũkũ pa'ija'mũ. ² Aina, mũsanũkonapi kuiraa'jũ chini jo'kasinare Diore cuasanare ovejava'naja'ñe pa'inare kuirajũ pa'ijũ'ũ.

Kurineema'ñe, re'oja'che cho'okaineeju, kuiracuhema'ñe Dioni pojoj Repau chiiche'te cho'oju masi kuiraju pa'ijũ'ũ repanare. ³ Musanukona chẽa paacojñonare cho'ocheja'che cho'oma'ñe re'oja'che cho'o ñoju pe'keru che'chojũ'ũ repanare, ña chẽa ũcuaja'che paapu chini. ⁴ Jã'aja'ñe cho'oju pani maire ovejava'nareja'che Paakuji jo'e ratu pã chũ'ũna tuhivũña'ñere ruu re'oja'chere ïsiuna koo ũcuauuna'me si'arumu chũ'ũju pa'ijanaa'me mai.

⁵ Musanukona na'a pũspã ũcuaja'che, umupãina'me romi, asarepajũ'ũ. Aina chũ'ũne jachama'ñe cho'oju pa'ijũ'ũ. ũcuauko, "Na'a ruu masi'umu chu'ũ", chiima'ñe, chekuna chũ'ũne sãĩnechi'a cho'okaiju pa'ijũ'ũ. Dios chu'o tocha jo'kasi'e ija'che kamu:

"Ruu masi'umu chu'ũ", chiina cho'oche ũsem Dios.

"Vesuva'ua'mu chu'ũ", chiinareta'ni oi re'oja'che cho'okaim Repau,

chiimu. ⁶ Jã'ajekuna, Dioni Peore Masiuni, "Peore Masiujeku chu'ũre ruu vesuva'ujekuna cho'okaijũ'ũ", chiiju pa'ijũ'ũ, Repauji musanukonani Repau'te uarumuna na'a masinare cho'oa'ku chini. ⁷ Maire ruu oikujekuna musanukonare pa'ivesache ũcuauni kujũ'ũ cho'okaau.

⁸ Ñarepaju pa'iju cu'ache cho'oche juvoju re'oja'che pa'imasiũ'ũ; vati maire cuheku chai kũni ãnisõnani ku'eku ku'icheja'che cacu'onani ku'eku si'arumu ku'iu pa'imu. ⁹ ũhasõma'ñe ũcua Dioni masi cuasaju vati chũ'ũne juvoju pa'ijũ'ũ, mai majapãijana cheja si'achejña cana ũcuaja'che cu'ache cho'ocojñoju pa'iche'te masiju.

¹⁰ Jã'ata'ni musanukona jmamakar cu'ache cho'ocojñosirumuna Pã Ai Dios musanukonapi koka paaju Repau'ni na'a masi cuasaju si'arumu na'a

re'oja'che paapu chini cho'okaija'mu. Ūcuauji maire Cristoni cuasaju Ūcuana'me si'arumu re'oja'che paapu chini chēa paamu. ¹¹ Repaute si'arumu cuhasōma'ñe, “Peore Masiu'mu mu'u”, chiiju pañu mai. Jā'aja'ñe paau.

Chu'o saoku cuhacho tochasi'ea'me

¹² Chu'upi ñato Jesuni cuasaku Repa chii che masi cho'okaiku Silvanopi tochakaiuna inukoruchi'a chu'vaku saomu chu'u musanukonare, Dios ūcuarepa cho'oku maire oi ch'okaiche'te asa pojoju re'oja'che paapu chini. Chu'u chu'vachu'ore ūcuarepare asa chēa ūhasōma'ñe masi cuasaju Repauni oicojñoju re'oja'che cho'okaicojñoju pa'ijũ'u.

¹³ Icheja Babilonia vu'ejoopo cana Jesure cuasakuanupu musanukona chēa paacojñoñeja'ñe Diore chēa paacojñoña ja'me chu'o saome musanukonare; chu'u chiija'iu, Marcos, ūcuachi'a. ¹⁴ Sãñechi'a cuasaju oiju sũ'ka pojoju pa'ijũ'u. Musanukona Cristo neena ūcuanuko re'oja'che pa'ijũ'u. Re'omu.

Pedro

Dios Chu'o Kuaphuro

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 4 Mar 2022

87a345ac-83c6-51ad-8750-17a703f38bcc